

CONVENIO ENTRE O CONSELLO GALEGO DE RELACIÓNS LABORAIS E A UNIVERSIDADE DE VIGO POLO QUE SE INSTRUMENTA A SUBVENCIÓN NOMINATIVA PARA A REALIZACIÓN DA VIII EDICIÓ DO “CURSO DE FORMACIÓN UNIVERSITARIA EN NEGOCIACIÓN COLECTIVA E INDIVIDUAL NO ÁMBITO LABORAL”.

MEMORIA XUSTIFICATIVA

O Consello Galego de Relacións Laborais, en xuntanza da Comisión Permanente de data 29 de xaneiro de 2025, e dentro do ámbito das súas funcións conforme á normativa reguladora, acordou a realización da “VIII edición do Curso de formación Universitaria de negociación colectiva e individual no ámbito laboral”, que se desenvolverá desde o 11 de setembro ata o 20 de novembro do ano 2025 na Facultade de Ciencias Xurídicas e do Traballo de Vigo.

A Universidade de Vigo conta cun dos Grados de estudos universitarios máis antigos de Galicia referido ao estudo das relacións laborais e os recursos humanos, onde se imparte durante dous semestres unha extensa formación en materias de negociación colectiva e individual, ademais de materias complementarias e específicas sobre seguridade social, traballo autónomo, emprego público ou prevención de riscos, nas que tamén se aborda a perspectiva negociadora. Alén disto, na Universidade de Vigo impártese o Posgrado en Xestión e Dirección Laboral, coa especialidade de Dirección Laboral de empresas, que ven sendo ano tras ano un dos máis solicitados polos estudantes que tras os estudos de Grao buscan a especialización nesta materia por ser das que contan con máis demanda á hora de acceder ao mercado de traballo. Dende a Área de Dereito do Traballo e da Seguridade Social da Universidade de Vigo, en tanto que se compón por especialistas no dereito colectivo, e, en concreto, no que respecta á negociación colectiva, vense

observando a necesidade de dar resposta a unha demanda dos interlocutores sociais e especialistas de Relacións Laborais e Recursos Humanos, como é un curso específico que aborde as técnicas de negociación. Do mesmo xeito acordouse igualmente abordar a negociación individual nos mesmos termos que se pretende que avance o Acordo Galego de Solución Extraxudicial de Conflitos. Tamén o contacto continuo que se ten cos axentes implicados na negociación –empresas, sindicatos, avogados especialistas, directores de recursos humanos...- ten posto de manifesto a necesidade de afondar no estudo e desenvolvemento destas importantes cuestións.

Tralo éxito e a positiva repercusión das sete pasadas edicións e pola demanda e gran utilidade da súa celebración coinciden as dúas institucións na importancia de levar a cabo unha nova edición (VIII), Este curso vai dirixido ás persoas responsables da interlocución social, ás que teñen responsabilidade en recursos humanos, xefaturas de relacións laborais, asesorías e demais axentes implicados na negociación e na xestión laboral da empresa, co obxectivo principal de dar resposta á demanda social que existe no territorio galego, así como a estudantes que rematen os seus estudos de Grao e desexen recibir unha formación especializada e de nivel sobre a negociación colectiva e individual no ámbito laboral. O alumnado estudará as técnicas e ferramentas clásicas e máis novas de negociación; adquirirán conciencia sobre a negociación colectiva e o diálogo social institucional en Galicia e no Estado español; aprenderán a negociar desde fórmulas que persigan resultados baseados na ganancia das dúas partes, a partir da análise dos intereses existentes máis que das posicións concretas, e repararán na oportunidade que supón a negociación colectiva como instrumento para a consecución do principio de non discriminación e igualdade por razón de xénero no ámbito das relacións laborais.

Mediante este convenio instrumentase a concesión á Universidade de Vigo da subvención prevista de forma nominativa na Lei 4/2024, do 27 de decembro, de orzamentos xerais da Comunidade Autónoma de Galicia para o ano 2025, nos termos recollidos neste convenio, polo que o Consello Galego de Relacións Laborais contribuirá ao financiamento deste curso de formación mediante a achega de DEZAOTO MIL EUROS (18.000,00€), con cargo ao capítulo IV do seu orzamento, aplicación 14.B1.324A.444.01, denominada “Subvención á Universidade de Vigo para curso de negociación laboral”, existindo crédito axeitado e suficiente segundo certificación expedida pola secretaria do organismo, que se xunta a este convenio como Anexo II.

A Universidade de Vigo percibirá, previa xustificación nos termos recollidos no presente convenio, unha achega de ata DEZASETE MIL CATROCIENTOS EUROS (17.400,00€), con cargo á citada aplicación orzamentaria 14.B1.324A.444.01. O Consello Galego de Relacións Laborais financiará con 30€ a matrícula de cada un dos 20 participantes propostos, sen que teña que ser adiantado, no momento de efectuar a matrícula, por parte dos participantes propostos por este organismo. A cantidade total de SEISCENTOS EUROS (600,00€) serán aboados á Universidade de Vigo unha vez rematado o prazo de matrícula. O dito importe será computado á marxe da subvención regulada neste convenio para o funcionamento do curso e dito importe non cobre os prezos públicos por expedición de certificacións en formato electrónico, que será abonado por cada estudante matriculado.

Santiago de Compostela, na data da sinatura dixital

A secretaria do Consello Galego de Relacións Laborais

Cristina Fabeiro Varela